

Rumor falso cu a detene ex-novio di Natalee

ORANJESTAD (AAN): Diahuebs si tabata un dia cu rumor a skeiro di robez bay pa drechi. Di pariba bay pa pabao. Pero e informe di DIARIO encuanto un pida weso di lomba haya den laman, si a worde confirma. Aunke Polis ta bisa cu ta nan mes a haya esaki, y no FBI. Den un otro articulo por lesa mas di esaki, aunke no tin confirmacion si e pida weso aki ta humano of di animal.

Mientras tanto, por a nota cu Diahuebs e buskeda pa cu e estudiante Natalee Holloway di Alabama, a sigui cu Side-Scan Sonar di e equipo di Texas Equusearch a sigui den laman bruto panort di Aruba.

Mientras tanto, Prome Ministro Nelson Oduber di Aruba a manda pidi yudanza di Merca, pa por usa e equipo special di US Navy, pa bin busca den laman panort di e isla.

Ta trata aki di e mesun equipo di scuba di Navy, cu a check e laman rond di Iraq pa explosivo prome cu e invasion Mericano por a tuma lugar recientemente. E peticion aki a worde haci door di Prome Ministro, den un carta dirigi na Senador Richard Shelby di Alabama.

Prome Ministro a worde informa di e existencia di e unidad aki, conoci como "Naval Special Clearing Team One", door di e expertonan di Texas Equusearch cu ta na e isla buscando Natalee.

E carta aki a worde manda door di Prome Ministro Oduber desde 1 di Juli caba, y awor cu e Senador a ricibi esaki, el a manda e peticion na Pentagono y State Department.

Prensa Mericano sinembargo a haya tende di vocero di US Navy, cu te ainda ningun peticion diplomatico a worde haci pa usa e team aki. El a cuestiona tambe con util e equipo special aki por ta den e caso,

como cu nan ta specializa den trabaonan di combate, manera detecta y elimina explosivonan bao di awa.

"Mi no sa pakico e team aki lo por ta mihor cu cualkier otro team, pero obviamente nan tin hopi experiencia trahando bao awa," e vocero Teniente Herb Josey a bisa.

Mientras tanto, Senador Shelby ta na Londres, y den un entrevista cu prensa Mericano, el a bisa cu e ta spera cu e peticion di Prome Ministro Oduber ta un paso genuino pa yuda e investigacion y no como retaliacion riba su keho cu e buskeda na Aruba no ta suficiente.

"Nos no ta bay stop," e Senador a sigui bisa. "Nos kier un investigacion profesional di loke ta pasando eybao. Nos no ta bay wak rond y ignora loke ta parece di no ta un investigacion completo, kizas uno hasta mal haci."


SPOTLIGHT A PAGA UN RATO

E acto terrorista cometi Diahuebs mainta na Londres, a reduci e claridad di spotlight riba Aruba. Pa varios ora largo, e canalnan Mericano no a ni dedica atencion mas riba Aruba.

Medionan di Aruba cu ultimo simannan ta haya avalancha di E-mail di Merca riba e caso aki, diripiente a ripara un caida drastico riba Diahuebs.

Esey ta exactamente loke algun observador a bin ta mustrand. Como cu no tabatin ningun otro "noticia grandi" ta tumando lugar, pesey Aruba a haye ta carga tur e peso. E spotlight riba Aruba tabata contene, no solamente noticia di loke ta pasando, pero tambe noticia distorciona cu tabata duna e audiencia Mericano un bista completamente brucha di loke ta pasa rond di e investigacion.

RUMORNAN CU TA 100% FALSO



Personal di Texas Equusearch usando Side-Scan Sonar abordo di e yate aki.

Fuera di esey, Diahuebs a bira un dia yen di rumor di noticianan cu finalmente a resulta di no ta berdad.

Rumor falso a circula cu un cadaver completo a worde haya na costa norte. Rumor falso a circula cu e caso di Natalee a haci Prome Ministro bira malo, te cu el a bay den exterior pa su salud. Rumor falso a circula cu FBI a detene y/o interroga un ex-novio di Natalee Holloway na Birmingham, Alabama.

Nada di e rumorman ey ta berdad! E ultimo mes, DIARIO a confirma esey cu fuente di FBI.

Ta lamentable cu algun medio di comunicacion a hasta transmiti esaki, incluyendo medianan di islanan Antiyano.

MAMA DI NATALEE LO PAPIA AWE

Informacion nobo ta muestra cu awemainta, Beth Hollo-

way Twitty a convoca un conferencia di prensa pa expresa algo na pueblo. No ta conoci si acaso e lo elabora riba e hecho cu Fiscal Majoor a apela e decision di Huez Comisario pa laga e rumannan Kalpoe den libertad. Tampoco si acaso e lo papia riba e hecho cu e Abogado di Joran van der Sloot a apela e decision tambe cu a prolonga detencion di su cliente.

E caso di e abogado aki lo tuma lugar Diamars awor, y tin indicacion cu un Huez completamente nobo lo atende esey. Den un otro relato awe, DIARIO ta splica esey.

E conferencia di prensa e biaha aki a worde yama na Oficina di e abogado kende ta representa famia di e mama.

WARDANDO E ANALISIS

Mientras tanto, autoridad na

Aruba ta wardando riba resultado di analisis cu e expertonan di potret ta haciendo na Curaçao.

E avionnan F-16 di Koninklijke Luchtmacht, ta lanta vuelo na Curaçao, haci nan scan riba Aruba, y despues ta regresa Curaçao. Aki e cassetteenan di film ta worde laba, y expertonan Hulandes cu a bin Antiyas, ta analisa cuidadosamente e potretnan aki.

Potretnan saca cu 'Heat Seeking Imagery', ta worde compara cu potretnan saca cu e camera di Daylight. Di e forma aki por analisa y descubri facilmente obhetonan scondi bao di tera, pa medio di e potretnan aki.

Algun di e filmnan aki ta asina sensitivo, te cu nan tin di worde manteni constantemente den frigidaire, te ora prome cu nan worde poni abordo di e avionnan F-16.

Corte Superior lo trata caso di apelacion di Joran

ORANJESTAD (AAN): Kico prensa Mericano ta haciendo cu Aruba? E mihor relato te awor a caba di aparece ayera den The Christian Science Monitor, na www.csmonitor.com

Mientras tanto, e

apelacionnan di tanto Fiscal como di Abogado di Joran, lo worde trata Diamars 12 di Juli door di Tres Huez di Corte Superior.

E tratamiento di e prome caso lo cuminsa pa 9:30'or di mainta na e edificio di Corte.